

adr-

ALTERNATIV DEMOKRATESCH
REFORMPARTEI

de pefferkär

D'Alternativ fir Déifferdeng

Gemengewalen 2017

Lëscht 7

Firwat sollt Där e Sonndeg d'ADR wielen?

D'ADR ass eng sozial engagéiert Partei, déi d'Wäerter, d'Kultur an d'Sprooch vum Lëtzebuerger Land vertritt a verdeedegt. Mir maachen eis staark dofir, datt eis Lëtzebuerger Traditiounen an eis Manéier mateneen ze liewen dem Land a senge Bierger erhale bleiwen. Net nëmmen um nationalen Niveau, mee och um kommunalen, triede mir a fir d'Rechter vum Eenzele an de Respekt vun der Demokratie.

Eng gutt Gemeengeféierung këmmert sech ëm d'Sécherheet an d'Biergerbedeelegung. D'ADR setzt sech a fir passend Sécherheitsmoossnamen an all Gemeng. Mir ginn eis net zefriden, bis all Mënsch sech hei am Land nees sécher fillt a séch iwwerall ouni Angscht beweegen kann, an dëst och zu spéider Stonn. A punkto Biergerbedeelegung fanne mir et méi wéi traureg, datt bis elo Gemeengepolitik dacks iwwert d'Käpp vun de Leit ewech gemaach gouf.

**ADR an
der Gemeng:
zesumme mat den
Awunner!**

D'ADR wëllt d'Gemengen zesumme mat hiren Awunner gestalten, an als hir Verrieder d'Gemeng geréieren, am plaz ze dirigéieren. Aus dësem Grond fuerdert d'ADR

kloer de Referendum op kommunalem Niveau a mécht sech staark géint Korruptioun a Vetterwirtschaft an der Politik. Zesumme mat den Awunner wëlle mir eng Gemeng schafen an erhalen, déi net just bewunnbar ass, mee och déi néideg Liewensqualitéit bitt. Dëst mat engem Wunnraum, deen d'Leit sech leeschte kënnen, ouni dofir mussen u Liewensqualitéit anzebéissen.

D'ADR mécht Politik, déi sech no de Bedierfnesser vun de Leit riicht an net ëmgedrënt. Mir sinn dofir fir eng realistesch an effizient Ëmweltpolitik, déi net duerch realitéitsfriem Normen a Virschreften de Leit an der Gemeng d'Bezuele vu Wunnraum onméiglech mécht. D'ADR wäert beim Erhale vu wäertvoller Baustanz hëllefen, an net d'Renovéieren an d'Baue mat iwwerspëtzte Reglementer onméiglech maachen. D'ADR mécht Politik fir d'Leit a mat de Leit.

Weider nach wëlle mir verhënneren, datt de Staat iwwert de Käpp vun de Gemengen ewech Entscheedungen trëfft, mat deenen d'Gemengen an hir

Awunner direkt konfrontéiert sinn. Sou wäerte mir et net hinhuelen, datt de Staat, ouni der Gemengen an hiren Awunner hiert Zoustëmmen, e Flüchtlingsfoyer an enger Gemeng ariicht.

Mir als ADR maachen eng kanner- a familjefrëndlech Gemeengepolitik. Mir fërderen héichwäerteg Crèchen, fuerderen awer, datt d'Elteren och ëmmer d'Méiglechkeet hunn, hir Kanner mat der néideger Zäit an Opmierksamkeet doheem erzéien ze kënnen. Mir sti fir eng Gemeengeféierung, déi maximal sozial ass, bei där kee Mënsch vergiess gëtt, och net eis eeler Matbierger, déi mat Krankheet oder Behënnerung.

D'ADR wäert sech dofir staark maachen, datt d'Gemeengefinanze kompetent, sozial a mat Verstand gereegelt ginn. Da kënn et net zu deenen onnëtzten an onsozialen Erhéijunge vun Taxen. Bestoend Taxe wäerte mir no soziale Kritären upassen, sou datt et hei eng méi gerecht Verdeelung wäert ginn. Deementspriedend géinge mir dofir suergen, datt d'Waassertax sozial berechent gëtt.

Sou hätt all Awunner pro Joer e gratis Waassersockel op de Kapp zegutt, an duerno gëtt de Waasserverbrauch mat enger progressiv gestaffelter Tax berechent. Domat hätt all Bierger säin néidege Grondverbrauch u Waasser ofgedeckt – schliisslech handelt et sech hei ëm e mënschlecht Grondbedierfnes. Esou eng progressiv Präisstaffelung géing awer gläichzäiteg verhënneren, datt déi liewenswichtig Ëmweltressource ouni nozedenke géng verbëtzt ginn.

**ADR:
jonk a
couragéiert**

D'ADR ass eng jonk a couragéiert Partei, déi hir Iddien net just a schéine Sondersriede verspricht, mee och wierklech duerchsetzt a sech honnertprozenteg fir hir Gemengen asetzt.

Duerfir:

Den 8. Oktober all Stëmm fir d'ADR. Fir eng besser Gemeng. ADR – déi richteg Alternativ!

**Finanzen:
kompetent a
sozial verwalt!**



Inhaltsverzechnes

Firwat sollt Där e Sonndeg d'ADR wielen?

Säit 1

Gratis öffentlechen Transport a keng Autos-Schikanen
Richteg wielen

Säit 2

Bezielbare Wunnraum mat Kapp a Verstand!
Fir datt all Bierger a senger Gemeng ka matschwätzen!
6 Prioritéite fir eis Gemeng
D'Regierung reift sech d'Hänn!

Säit 3

Öffentlech Sécherheet ass Sécherheet fir Jiddereen!
Beim Zuch- a Busabonnement hëllefen
Eng jugendlech Gemeng

[Member-Formular](#)

Säit 4

30 Fudder Waasser gratis op de Kapp géint deier „gréng“ Gemeengepolitik
Historesch an architektonesch Schätz fleegen!
Alternativ parken

Säit 5

Wat sinn d'Alternative fir Är Gemeng?
De Rettungsdéngscht a sécher Gebaier ...
Alternativ Verëffentlechege
Alternativ Mobilitéit ...
Alternativ Energie?

Säit 6

Zäit fir alternative Wuesstem
Politesch Schäinhellegkeet
an der Wuesstemfalle

Säit 7

[Eis Kandidat fir Är Gemeng](#)

Säit 8



Richteg wielen!

Dir wëllt der ADR bei dëse Gemengewalen esou gutt wéi méiglech hëllefen? Eise Walsystem erlaabt lech dat op zwou Manéieren:

Am einfachsten a séchersten ass ët, de Krees iwwer der ADR-Lëscht schwaarz ze maachen. Esou stellt Där sécher, datt keng Stëmm fir d'ADR verluer geet. Dir hëlleft allen ADR-Kandidate gläichermoossen.

Wann Där awer ee besser kennt oder besonnesch gutt fannt, kënn Där Ärem Wonschkandidat och zwou Stëmme ginn. Duerno fänkt dann d'Zielen un: An de Kästecher hannert de Kandidaten kënn Dir **am ganze 19 Kräizer** verdeelen, dann hutt Där Äre Stëmmemmaximum erreecht. De Krees däerft Där dann NET méi markéieren.

adr.

A.D.R - Alternativ Demokratesch Reformpartei

Carlizzi Gilles		
Klein Jean		
Angelini Valentino		
Cabo da Costa Olivia Maria		
Carlizzi Nico		
Faber Christian		
Gasbarrini Olympia		
Giannotte Joëlle		
Holper-Gilbertz Marie-Josée		
Mamer Luc		
Melchior Antoine		
Müller Christian		
Raach Philippe		
Raschella Nicodemo		
Schroeder Jean-Marie		
Seidel Steve		
Seidel ép. Klein Viviane		
Thoss Gisèle		
Valle Mireille		

Gratis ëffentlechen Transport a keng Autos-Schikanen



Déifferdeng a seng al Gare, déi dréngend misst frësch gemaach ginn!

De Verkéier zu Lëtzebuerg gëtt ëmmer méi schlëmm. D'Gemeng muss e sécher a gläichberechtegt Matenee vun alle Verkéiersdeelhueler garantéieren.

D'ADR huet eng kloer Linn a Saachen ëffentlechen Transport

- Mir trieden a fir gratis ëffentlechen Transport fir jiddereen
- Gemengenefforten fir den ëffentlechen Transport musse vum Stat ënnerstëtzt ginn
- Den Tram ass keng Solutioun vum Verkéiersproblem a mir si géint d'Ubanne vu weideren Uertschaften
- Gemenge solle sech esou effikass wéi méiglech a regionale Reseauen verbannen, dat an enker Ofsprooch mat den Awunner. All Mënsch muss och no der Owes-Virstellung am Kino (also bis Hallefnuecht) nach gutt mam ëffentlechen Transport heem kommen
- D'Awunner sollen zum Beispill iwwer d'Zuel an d'Plaz vun den Haltestellen an och iwwer d'Organisatioun vum Schoultransport kënne matschwätzen

ADR:
jonk a
couragéiert

I w w e r w a a -
chungskameraen
a Bussen an Zich
maachen den ëf-
fentlechen Transport
méi sécher

- Individualverkéier muss eng Wiel bleiwen

Dräi Véirel vun den Trajeten am Land gi mam privaten Auto gemaach. Et ass net un enger Gemeng oder um Stat, dëse private Choix ze kontestéieren oder ze beaflossen.

D'ADR ass géint Schikanen fir Autofuerer (iwwer-

driwwen Verkéiersberouegung, kënschtlech Verknappung an Iwwerdeierung vu Parkméiglechkeeten, ze knappe Parking résidentiel, ze penibel Kontroll vu Parkziedelen op d'Sekonn ...).

Null Toleranz erwaart deen Automobilist, deen ze séier an der Uertschaft ass, récksiichtslos parkt oder nuets onnéideg Kaméidi mam Auto mécht.

Null Toleranz gëllt fir Foussgänger a Vëloen, déi sech net un d'Verkéiersregelen halen.

Onnéideg geféierlech Situatioune (Bus- oder Vëlospueren a Géigerichtung an Einbahnstroossen, Vëlospueren op Trëttoiren an a Foussgängerzonen ...) wäert d'ADR net bestoe loosse.

Mir garantéieren

- en Ausnotze vum ganze méigleche Parkraum vun der Uertschaft
- eng Reglementéierung vum Parke vu Betribscamionnetten ausserhalb vu Wunnzonen
- fléissende Verkéier op den Haaptverkéiersachsen an d'Uertschaft an aus der Uertschaft mat, wann néideg, entsprechende Contournementen
- verkéiersberouegt Wunnquartieren
- gudd Stroosseninfrastruktur a Verkéiersweeër, an dat och fir Foussgänger a Vëlofuerer

De Vëlo ass an deene meeschte Fäll méi e Sport- a Fräizäitgefier wéi e Fortbewegungsmëttel fir schaffen oder akafen ze fueren. Deementspriedend sollte Vëlospisten och méi regional an touristesch gesinn an ausgebaut ginn.

Vëlosservicer, wéi si a verschiddenen Uertschaften bestinn, géinge vun eis op hiren Notzen an hir Käschte gepréift ginn. Och de Sécherheetsrisiko duerch ongeübte Vëlofuerer, de récksiichtslosen Asaz a Foussgängerzonen, d'Benotze vum Vëlo als Spillsaach an de Vandalismus, deem dës Gefierer ausgesat sinn, sollen ënnersicht ginn.

D'Alternativ fir Är Gemeng!

Bezuelbare Wunnraum mat Kapp a Verstand!

Wat kann d'Gemeng maachen fir hiren Awunner genuch Wunnengen zu engem bezuelbare Präis ze bidden. Si huet zwou Zorte Klientel: Leit, déi genuch Mëttelen hunn, fir eng eege Wunneng ze finanzéieren oder ze lounen, a Leit, déi ganz reell finanziell Schwierigkeeten hunn, um Lëtzebuerger Wunnengsmaat en Daach iwwert dem Kapp ze fannen. Leit, déi an enger Gemeng lounen, sollte sech kënnen op eng gudd funktionéierend Loyerkommissioun verloossen, déi mat duerfir suergt, datt si net ze deier bezuele mussen.

Moosname fir Leit mat klengem Akommes

All Gemeng soll fir sech e gewësse Prozentsaz u gutt iwwer d'Quartiere verdeelte Sozialwunnengen festleeën fir keng "Ghettoen" ze schafen. Gemenge mat ville Sue kënnen an e Fong fir soziale Wunnengsbau investéieren.

- D'Prozedur fir eng sozial Wunneng zougedeele ze kréien, muss transparent sinn, esou datt jiddereen ka wëssen, wéini him ka gehollef ginn.
- D'Gemeng soll hire Bierger awer och hëllef Proprietär ze ginn, z.B. mat Bankgarantien.
- "Portage foncier" ass besser wéi "Bail emphytéotique". Beim Portage gëtt de Bauterrain fir e symbolesche Betrag gelount, de Kaupräis erfällt no e puer Joer, wann zum Beispill de Bau vum Haus bezuelt ass.

Bei gréissere Projeten am soziale Wunnengsbau soll en Deel Wunnengen fir Leit reservéiert sinn, déi net genuch verdéngen, fir eleng ze bauen, awer zevill, fir vum Stat gehollef ze kréien.

Moosname fir Leit, déi bauen oder kafen

- D'Baufuerderungen däerfen de Präis vum Bau net iwwerdréien an den Himmel dreien. Eng Gemeng däerf net den Haustyp (Passivhaus) bestëmmen.
- D'ADR ass géint staatlechen Zwang an Amëschen a privat Affären: Dat gelt och fir d'Virkaufsrecht vun der Gemeng, fir Baulücken an eidel Wunnengen. Proprietären däerfen vum hiren Gemeng net gediengelt ginn mä si sollen iwwerzeegt ginn.
- Verkeeft eng Gemeng hir eegen Terrainen um fräie Wunnengsmaat, däerf si net Maartpräiser froen. Si muss hëllef, de Präis vum Baupland bezuelbar ze maachen.

Dat traditionellt Lëtzebuerger Bild vum eegenen Eefamilljenhaus ass fir vill Leit net méi ze bezuelen. Dat wäert de Charakter vun eisen Uertschaften änneren. D'Gemeng muss awer oppassen, datt hire Charakter net vëlleg entstallt gëtt. Si muss kucken fir ënnert dem Bevëlkerungsdrock natierlech ze wuessen a weider Liewensqualitéit ze bidden. Si däerf net zur Schlofgemeng oder zur Wunnsiddlung ouni Séil ginn.



Bezuelbaren a liewenswäerte Wunnraum ass beim aktuelle Wuesstem déi Erausforderung ...

Fir datt all Bierger a senger Gemeng ka matschwätzen!

D'politescht Matsproocherecht vum eenzele Bierger ass fir d'ADR ganz wichteg. Mir stinn dofir an, datt déi direkt politesch Bedeelegung an d'Transparenz an der Gemeng erhalen a weider ausgebaut gëtt, andeems:

- de lokale Referendum mat vereinfachte Modalitéiten erméiglecht gëtt
- d'Bierger gutt a korrekt informéiert ginn, ënner anerem duerch:
 - ◊ d'Internetiwwerdroung an d'Archivéiere vu Gemengerotsëtzungen
 - ◊ objektiv a politesch neutral Berichter vun de Gemengesëtzungen fir all Stot an dat net erëischt Méint no der Sëtzung
 - ◊ Informationsversammlunge viru grouss Projeten a wichtige Entscheedungen

◊ e lokalen Televisiounskanal vun der Gemeng iwwer Kabel-TV an/oder Internet

Der ADR no muss den Dénkscht um Bierger fir d'Gemeng un éischter Plaz stoen. Dowéinst këmmere mir eis dorëm, datt d'Gemeng

- Verwaltungsweeër esou einfach wéi méiglech mécht
- och baussent „normalen“ Bürosstoen fir des Demarchen op ass
- och fir staatlech Verwaltung Biergerfroen entgéin huelen an dobäi berode kann
- méiglechst vill Demarchen och iwwer Internet ubitt
- nieft dem online-Format ëmmer och d'Pabeierformat ubitt.

6 Prioritéite fir eis Gemeng

1. Bezuelbaart Wunnen: D'ADR huet konkret Solutiounen fir d'Gemeng!
2. Öffentlech Sécherheet heescht Sécherheet fir jiddereen: Eis Gemeng brauche méi Police, eis Bierger brauche Kommissariat, do, wou si wunnen.
3. Mobilitéit ouni Dirigismus: D'Gemeng organiséiert de Matenee vun Auto, Foussgänger a Vëlo. Si mécht net de Choix vum Verkéiersmëttel.
4. Famillje mat Kanner beschméiglech ënnerstëtzen: Mir brauchen Uertschaften, wou Kanner sech kënnen wuelfillen an entfalten.
5. D'Lëtzebuerger Sprooch als wichtegst Mëttel zur Integratioun: Un der Gemeng ass et, eis Sprooch ze verbreedden.
6. Flüchtlingen ophuelen, mat Häerz awer OCH mat Verstand: D'Gemeng muss an dëser Fro matschwätzen an d'Decisiounen däerfen net iwwer d'Käpp vun de Bierger ewech geholl ginn.

D'Regierung reift sech d'Hänn!

Ass lech eigentlech opgefall, datt de ganze Summer, an elo nach bis an den Hierscht iwwerhaupt net vun eiser Regierung geschwat ginn ass? Bei hirem Beléiftheetsgrad wäert Gambia doriwwer awer och net rose sinn. Esou Gemengewale sinn dach och d'Geleeënheet, fir Gambia ze weisen, wéi beléift d'Regierung ass.

Tatsächlech steet d'Regierung och an dëse Gemengewalen zur Wiel: Et sinn déi nämmlecht Parteien, déi d'TVA erhéicht hunn, déi an de leschte Joren ënnert ecologesche Virwänn och un de Gemengentaxe gedréit hunn, bis vill Leit et bal net méi packen.

Et ass déi nämmlecht Regierung, déi op Wuesstem schwiert, an deenen hir lokal Politiker d'Infrastrukturen net méi an der Rei gehale kréien a keng bezuelbar Wunneng an hiren Gemeng kënnen presentéieren. Wann d'Gemengen am Verkéier erstécken, läit dat un deem Wuesstem, deen d'Regierungsparteie mam bloe Finanzminister a mat de Gambia-Lokalpolitiker an der Chamber feieren. An de gréngen Transportminister kritt de Chaos net an de Grëff.

Et ass d'Gambia-Regierung, déi d'Stied forcéiert, ëmmer méi Awunner ze hunn an och dat leschte Stéck Gewan zouzebauen fir méi Suen ze kréien. Net nëmme schued d'Politik de Landgemengen, mee si mächt d'Hauptstad an d'Gemeng ronderëm an och grouss Südgemengen, well si wuessen, obwuel déi haut schonn éischter zevill Awunner hunn, wéi net genuch.

Wann also DP, LSAP an Déi Gréng lech dat Blot (oder dat Rout oder dat Gréngt) vum Himmel versprochen oder sech iwwert den Zoustand an der Gemeng bekloen a soen, si kéinten awer net duerfir, denkt drun, datt si an hir Parteien an der Chamber déi Politik matdroen, déi hei am Land d'Problemer mécht!

Beim Zuch- a Busabonnement hëllefen ...

Mir fuerderen, datt den ëffentlechen Transport gratis gëtt. Esou laang dat net de Fall ass, soll sécher gestallt sinn, datt déi Leit, déi sech net esou gutt stinn, esou mann wéi méiglech fir Zuch a Bus bezuelen.

Fir si ass ee Joresabonnement e ganz deiert Investissement. Dat ass awer 160 Euro méi bëlleg wéi 12 Mount-Aboën. Dofir wäert all Gemeng, wou d'ADR eppes ze soen huet, d'Jores-Abonnement finanzéieren hëllefen. Et kann da kamoud am Laf vum Joer zrëckbezuelet ginn ...



Eng jugendlech Gemeng

D'Drogeproblematik bei der Jugend bleibt leider aktuell. Si stellt sozial an och gesondheetlech, fir de Beträffenen a fir seng Famill a säin Ëmfeld e grouse Problem duer.

D'ADR setzt sech dofir an, datt d'Gemeng e spezielle Service schaaft, deem déi betraffe Jugend opfänkt. Dëse Service soll eng diskret Ulafstell bidden, wou betraffe Jugendlecher an hiert Ëmfeld sech kënnen beroden an hëllef loossen. Mir wäerten och Selbsthëllefgruppen an der Gemeng fërderen a probéieren, hinnen esou diskret wéi méiglech Versammlungsméiglechkeeten ze ginn.

Mir suergen dofir, datt et en aktivt Jugendhaus gëtt, wou Jonker sech entfale a beschäftege kënnen, mat Hëllef vun Educateuren, wa si dat wëllen.

Ëffentlech Sécherheet ass Sécherheet fir Jiddereen!

All Mënsch huet e Recht drop, sech a sengem Land, senger Gemeng a sengem Heem sécher ze fillen! Dofir mussen de Stat an d'Gemeng enk zesummeschaffen. Bei där Zesummenaarbecht muss d'Gewiicht vun der Gemeng awer rëm méi stark ginn, well dës am nooste mam Bierger a Kontakt steet. Duerfir setze mir eis duerfir an, datt

- de Stat an d'Gemeng Hand an Hand schaffen
- Themen, wéi z.B. d'Burka-Verbuet, déi just national an eenheetlech kënnen gereegelt ginn, net dierfen op d'Gemengen ofgewänzt ginn
- D'Zesummenaarbecht tëscht der Gemeng an der Police muss awer och méi enk ginn.

Hei maache mir eis staark dofir, datt d'Gemeng

- zesumme mat der Police a mat senger Bierger e lokale Sécherheetsplang ausschafft, dee reegelméisseg op seng Effikassitéit iwwerpréift gëtt
- méi e groust Matsproocherecht bei der Polizeipräsenz huet, mat Berécksiichtigung vu de kommunale Policereglementer
- op besonnesch sensibelen, ëffentleche Plaze Kameraen installéiert ginn, awer ënner strengen Oplagen a mat Respekt virun der Privatsphär

D'Police muss méi no bei de Bierger. Si soll méi eng grouss Präsenz um Terrain weisen an et dierf net zu rechtsfräien Zone kommen, wou d'Police net higeet. Duerfir setze mir eis duerfir an, datt

- d'Police déi néideg Moyenen (z.B. de Plazverweis) a genuch Leit huet, fir agéieren ze kënnen
- a méi onrouege Quartiere Kommissariater kommen, déi 24 op 24 Stonne besat a fir d'Bierger accessibel sinn
- d'Police, wann si et wënscht, adequat Lokaler vun der Gemeng zur Verfügung gestallt kritt

D'ADR wäert sech weiderhi fir d'Konzept vun enger Noperschaftspolice asetzen.

Aarmut an organiséiert Heeschen

D'ADR suert dofir, datt d'Gemeng efficace Méiglechkeete kritt, fir organiséiert Heescherei, sou wéi aggressiivt Biedelen ze verbidden. D'fräit Zirkuléiere

vun den Bierger an Europa gëllt, wann dës genuch eege Mëttelen hunn, fir hir Existenz ofzesécheren. Dëst soll och um kommunale Plang agehale ginn. Fir dat ëmsetzen ze kënnen, mécht sech d'ADR staark, fir datt d'Police

- mat der Ënnerstëtzung vun der Justiz an eventuell vun der Douane, déi néideg Moyene kritt, fir dat organiséiert Heeschen an de Grëff ze kréien
- gewësse Leit e Plazverweis ka ginn, woumat hinnen den Openthalt op bestëmmte Plazen verbuede gëtt
- dës Dispositioun net just bei organiséierten Heeschebanden oder bei aggressivem Biedelen uwende kann, mee och géint aner Banden, kriminell Organisatiounen an Drogendealer virgoe kann

Nëmmen esou Moosnamen an deem néidege gesetzelche Kader kënnen zu enger Verbesserung vun der ëffentlecher Sécherheet féieren.

Der Aarmut muss anescht entgéintgewierkt ginn, wéi Heeschen als e Mënscherecht ze deklaréieren. Fir d'ADR kann dëst keng Léisung sinn. Dofir ënnerstëtze mir – net just op nationalem, mee och op kommunalem Plang – datt Leit an Nout, déi e Recht hunn, hei am Land ze sinn, gehollef kréien. Als méiglech Moosnamen, gesi mir vir, datt déi Beträffen

- en Ënnerdaach an en würdegt Liewen erméiglecht kréien, z.B. mat betreitem Wunnen, Nuetsfoyeren, Vollekskichen, Kaffis- an Téistufen
- déi an enger spezieller Situatioun sinn, – Kopelen, Leit mat Kanner oder mat Hënn, asw. – gëeegent Léisunge musse proposéiert kréien
- och op kommunalem Plang vu besser koordinéierten zoustännegen Organisatiounen betreit ginn

Mat esou Moosname viséiere mir, d'Leit „déi op der Strooss liewen“ nees an d'Gesellschaft ze integréieren, mat enger Wunneng, enger Aarbecht, an enger reeller Liewensperspektiv.

----- ausschneiden an un ADR 20, rue de l'Eau L-1449 Lëtzebuerg schécken -----



Gidd Member an der ADR, a frot och Aër Familljemembren a Frënn, fir Member ze ginn.

De Joresbeitrag ass fir eng Persoun 14.-€, fir e Stot 20.-€, a fir Schüler a Studenten 5.-€

Numm & Virnumm:

Adress:

Telefon:

Email:

de pefferkär

Oplag: 9.800

**Verantwortlech fir dëse
Pfefferkär**

**fir d'Gemeng Déifferdeng
ass d'Alternativ Demokratesch
Reformpartei
22, rue de l'Eau
L-1449 Lëtzebuerg**

www.adr.lu

30 Fudder Waasser gratis op de Kapp géint deier „gréng“ Gemengepolitik

Schonn e komescht Gefill, wann ee mueres fréi d'Leit mat hire Grompereschiele gesäit ëm d'ëffentlech Dreckschëscht schläichen ... Dreck ass e richteg deiere Spaass ginn. Duerfir entsuerge Leit hir Reschter ëmmer méi dacks an d'ëffentlech Dreckschëscht, déi dann och séier voll sinn, esou datt d'Leit net wësse wouhi mat deene Saachen, déi daags iwwer esou ewech ze geheie sinn, wann ee net doheem ass.

Gewosst ass, datt praktesch all zweet eleng erziend Mamm de Risiko huet, an d'Aarmut ze falen. Wéi esou eng Mamm mat zwee kleng Kanner an engem entsprecheenden Verbrauch u Wändelen iwwer d'Ronne soll kommen, wann eis Gemeng hir bei der Poubelles-Tax esou déif an d'Täsch fiert?

Un deem Beispill erkennt een, wéi ongerecht déi Gemengentaxe sinn. Si treffe jidfereen d'nämmlecht, deen, de sech et ka leeschten an esou Zommen aus dem Arm rëselt, awer och deen, deen all Mount Problemer huet, fir iwwer d'Ronnen ze kommen. Dat ass genee wéi d'TVA, déi och den Ënnerscheed net mécht, ob deen deen akeeft, räich oder aarm ass. Dës Taxen treffe jidfereen d'nämmlecht, awer si dinn deenen enge méi wéi wéi deenen aneren.

Et war ni esou, datt d'Leit Problemer haten, fir d'Rechnunge vun der Gemeng ze bezuelen. Et ass awer esou, datt d'Taxepolitik an eng Richtung gaangen ass, datt d'Leit ëmmer méi déck Rechnunge kritt hunn. No enger grénger Iddi sollten d'Leit reell bezuelen, wat e Gemengeservice kascht. Dat onofhängeg dovun, datt vill Gidder a Servicer, déi d'Gemeng eis verkeeft, jo net der Gemeng gehéiere mee ... och

**Gréng
wierkt ... op
de Portmonni!**

all deene Leit, déi et deier musse bezuelen.

Zum Beispill d'Waasser, wat ee fréier selwer un eng Quell siche gaangen ass. Parallel sinn ëmmer méi streng Riichtwäerter festgesat ginn,

déi d'Liwwerung vun extra propperem Waasser och ëmmer méi deier gemaach hunn. Allerdéngs ass d'Waasser och ëmmer méi belaascht ginn a war méi schwéier drénkfäerdeg ze maachen. Dat war awer net d'Schold vun all Mënsch, mee all Mënsch muss haut fir déi deier Filteranlage bezuelen.

D'ADR setzt hei un an zwar mat enger sozialer Approche.

Eis Iddi fir all Mënsch fir d'éischt emol 30 Fudder (30.000 Liter) Waasser am Joer gratis ze ginn an de

Waasser-
b r a u c h ,

deen doriw-
wer eraus

geet progres-
siv gestaffelt ze

taxéieren, mécht ge-

nee dat. Dat Gratis-Waasser

geet ongeféier duer fir de Verbrauch fir d'perséinlech Hygiene ze decken. Wat elo am Stot nach ufällt fir Kachen a Botze kascht e vernënftege Waasserpräis.

Wien allerdéngs all Dag e Riesegaart netzt (ouni Reewaasser duerfir ze sammeln), wien all Dag Trëttoir, Gaardemauer a viischt Traap ofsprëtzt an den Auto wäscht an eventuell och nach eng grouss Schwämm hannert dem Haus huet, muss sech bewusst sinn, datt dee Luxus op d'Waasserrechnung schléit esou bal säi Verbrauch iwwer dem Sockel läit.

- **D'ADR setzt sech a fir de Bierger!**
- **D'ADR denkt an handelt sozial!**
- **Bei der ADR geet d'praktesch Approach iwwer all blann Ideologie.**

D'ADR ass géint Dirigismus iwwert de Portmonni: Mir sinn do fir dem Bierger ze hëllefen, an net fir de Bierger mat deieren Taxen ze strofen. Mir halen eis net fir de d'Schoulmeeschter vum Land ... an ënnerscheeden eis domat vun allen anere Parteien.



Historesch an architektonesch Schätz fleegen!



Der ADR ass et wichteg, datt eng bestëmmte Liewensqualitéit an der Gemeng ginn ass. Dëst steet am direkten Zesammenhang domat, datt en Ëmfeld erhalten oder geschaf gëtt, an deem d'Leit sech kënnen wuelfillen. Dozou gehéiert och d'Erhale vun eiser traditioneller Bausubstanz a vum Charakter vun der Stied an Dierfer. Schliisslech ass dëst – nieft der Lëtzebuerger Sprooch – e wichtigen Aspekt vun eiser Identitéit.

Mir setzen eis dofir an, datt

- regional-typesch Gebaier a Bausubstanze mat kulturellem Wäert erhalen ginn
- et kommunal Subside ginn, fir d'Renovatioun an d'Sanéierung
- d'Gemeng, wann néideg, wäertvoll Gebaier keeft, fir den Erhalt ze sécheren
- d'Bierger fir déi kulturell Schätz vun hirer Uertschaft sensibiliséiert ginn
- d'Gemeng dofir suergt, datt historesch Plazen net duerch onpassend Konstruktiounen verschampeléiert ginn
- mat kierchleche Bausubstanze verantwortungsvoll a respektvoll ëmgaange gëtt

Alternativ Parken

Den Auto parken ass an der Gemeng Déifferdeng net grad déi einfachst Aufgabe, wann et souwuel no wéi och bëlle soll sinn. De System vun der „vignettes résidentielles“ misst amendéiert ginn. D'vignette „D“ misst am ganze Secteur vum Zentrum vun Déifferdeng gültig sinn, wat se de Moment net ass, ausserdem sollt de Secteur „Plateau du Funiculaire“ an en aneren Secteur afléissen, z.B. den Secteur „D“.

De Parking „Contournement“ misst ausserdem käschtefräi zougänglech sinn fir all Vignette (N,D,F,O,PF), dëst géif d'Quartieren deelweis entlaaschten.



Walprogramm (Lëtzebueresch)

- https://adr.lu/alternativ_2017_l/

Wahlprogramm (Deutsch)

- https://adr.lu/alternativ_2017_d/

Programme électoral (Français)

- https://adr.lu/alternativ_2017_f/

Election program (English)

- https://adr.lu/alternativ_2017_e/

Programa eleitoral (Português)

- https://adr.lu/alternativ_2017_pt/



Alternativ Verëffentlechungen ...

Eist Déifferdenger „infoblat“, dat eis d'Compte-Rendu vum de Gemengerotssätzungen liwwert, gëtt ganz dacks, pardon, ëmmer mat méintelaanger Verspéidung no där respektiver Sëtzung verëffentlecht. D'Bierger vun Déifferdeng ginn net an Echtzäit iwwer déi wichteg Sujeten an der Gemeng informéiert. D'ADR fuerdert dofir, datt d'„infoblat“ spéitstens 1 Mount no enger Gemengerotssëtzung ënnert de Leit ass, fir datt jidderee sech kann informéieren, wat fir eng Politik zu Déifferdeng gemaach gëtt.

Alternativ Mobilitéit ...

Den „Diffbus“ ass eng ganz gudd Transportméiglechkeet fir vill Leit aus der Gemeng, eng gudd Alternativ zum Auto, fir déi kuerz Strecken an eiser Gemeng.

Dës Joër ass en véierten Diffbus an de Fuhrpark dobäi komm, den „Express“, eng Investitioun, déi net ganz sënnvoll ass. Engersäits absolvéiert dës nei Linn quasi déi selwescht Streck ewéi den Uewerkuerer Diffbus. Anerersäits sinn d'Leit, déi op Nidderkuer müssen, weider forcéiert, op den Nidderkuer Diffbus ëmzeklappen.

Alternativ Energie?

Vill Wand gëtt gemaach ëm de Wandpark „Diff-WAND“ zu Uewerkuer, dee vill vill Problemer bréngt, awer wéineg Energie! An deenen nächsten zwee Joër soll dee Wandpark um Plateau vum Vesquenhaaff zu Uewerkuer entstoen.

Allerdengs gesäit et aus, wéi wann de Projet nach net um Lafe wär: Den **ADR-Süddeputéierte Fernand Kartheiser** hat an dëser Fro nämlech nogebuert. An eng interessant Äntwert vum der Ëmweltministesch Carole Dieschburg kritt. Dora gëtt des laangen an des Breeden erklärt, wat d'Lëtzebuerger Normen sinn, fir esou e Park ze installéieren. Normen, déi net hëllefen, fir definitiv ze soen, ob esou e Projet um Vesquenhaaff däerf installéiert ginn ...

D'Käraussoe vum Ministär liest Där hei: „*Fir d'Wandenergieanlagen zu Déifferdeng gëtt et bis ewell keng Geneemegungsfro. D'Ëmweltverwaltung huet op Basis vum engem éischten Dossier decidéiert, datt fir de Projet eng Ëmweltimpaktetud (EIE - évaluation des incidences environnementales) op Basis vum groussherzogleche Reglement vum 7 Mäerz 2003 gemaach muss ginn. Am Kader vum dëser Etüd ginn déi direkt an indirekt Wierkungen vum Projet op d'Ëmwelt analyséiert a bewäert (...) Ausserdeem muss méiglech Varianten vum Projet duergestallt ginn. (...) D'Etüd an hir Konklussioun ginn dann am Kader vum der KommodoProzedur matt an d'enquête publique, wou all Bierger seng Observatiounen kann abréngen.*

D'Decisioun, ob e Wandpark kann geneemegt gin, gëtt eréischt no der Enquête publique an de Stellungnaamen vun de betraffene Gemengeréit vun den zoustannegen Ministeren geholl. (...)

Nieft de Simulatiounen a Berechnungen zum Kaméidi an zum Schied gin och Etuden iwwert d'Auswierkungen vum Déifferdenger Projet op d'Natur an d'Landschaft vum Bedreiwier erstallt, esou wéi daat och bei aaneren Wandparken gemaach gëtt. Dës betreffen e.a. d'Flantermais, d'Vullen, d'Auswierkungen op Natura 2000 an d'Landschaft. All des Etuden gin dem Public virgeloet.“

Wat sinn d'Alternative fir Är Gemeng?

Mir stellen an der Gemeng déi richteg Froen: Wat notzen zum Beispill déi bescht Reglementer, wann net genuch Police d'Sécherheet ka garantéieren?

D'ADR ass och géint d'staatelecht Ariichte vu Flüchtlingsfoyeren, ouni datt d'Gemeng an hir Bierger gefrot ginn. Beim Wunnengsbau weess d'Gemeng besser wéi de Stat, wou séier ka Wunnraum geschaf ginn.

D'Gemeng ass do, fir hire Bierger d'Liewen einfach ze maachen. Un d'Beruffs- a Privatliwwen ugepassten Öffnungszäiten, „Guichet unique“-Funktione fir staatelech a kommunal Froen an Internet-Interaktivitéit sinn do néideg.

Op de Gesondheitsniveau iwwerdroen: Eng ADR-Gemeng wäert Drock maachen fir mat regionalen Dokteschhaiser (an hiren Hausapdikten) eng zäitgeméiss Versuergung, déi de berufflechen a familiäre Besoine vun de Bierger entsprécht, ze organiséieren.

D'Gestioun vun de Gemeengefinanze „en bon

père de famille“ heescht, datt Kreditter just fir konkret Investitiounen opgeholl ginn.

Et ass net un der Gemeng, z. B. iwwer intelligent Compteuren, den Energiekonsum vun hire Bierger auszespionéieren.

Realistesche Klimaschutz ass eng Gemeengeprioritéit: D'Nodeeler vun erneierbaren Energien – Kaméidi, Ästhetik, Schied an der Natur, finanziell Auswierkungen – däerfen net op de Bierger oder Betriber ofgewänzelt ginn.

D'Gemeng ass awer net do fir hir Bierger duerch héich Taxen ze zillen oder duerch eng Verknappung vu Parkplätzen, onsënneg Reglementer an aner Schickanen um Autofueren ze hënneren.

D'Gemeng soll beim Erhale vu wäertvoller Bausubstanz hëllefen, an net d'Renovéieren an d'Baue mat iwwerspëtzte Reglementer onméiglech maachen.

D'ADR verdeedegt de Choix vum Bierger a säi Recht, säi Liewen an eventuell säi Betrib no beschemt Ermoossen ze féieren.



Wat notzen déi bescht Reglementer, wann net genuch Police d'Sécherheet garantéiert?

De Rettungsdéngscht a sécher Gebaier ...

D'ëffentlech Ariichtunge vun enger Uertschaft kënnen Schutz bidden an zur Sécherheet bäidroen, wa si bestëmmte Konditiounen erfüllen. Dowéinst setzt sech d'ADR an der Gemeng dofir an, datt

- urban Miwwelen (Busarrêten, Bänken asw.) op ëffentleche Plazen op eng Manéier ugeluecht sinn, déi weder donkel Gestalten nach Vandalen ulackelen
- ëffentlech Gebaier, (d'Gemeng, d'Schoulen, asw.) duerch technesch Moosname wéi Alarmanlagen oder duerch d'Präsenz vu Personal geschützt ginn
- Och de Rettungsdéngscht spillt eng Roll bei der Sécherheet. Oft si Mënschen an Noutfäll – wou et net seelen ëm Liewen an Dout geet – op hir Präsenz a qualifizéiert Hëllefsléschungen ugewisen. Eng national Reform vum Pompjees-

a Rettungswiesen ass amgaang, iwwer d'Bühn ze goen.

D'ADR begréisst déi grouss Prinzipie vun dëser Reform, awer mir maachen eis och staark dofir, datt:

- d'Gemeng hei net u Responsabilitéit verléiert, andeems eng ganz Rei vun de Gemengenaufgaben op den nationale Plang iwwerdroe ginn
- d'Pompjeesveräiner an deenen eenzelen Dierfer a Quartieren bestoe bleiwen, fir weiderhi méiglech vill Fräiwëlleger am Rettungsdéngscht ze hunn dës lokal Kräfte Ënnerstëtzung kréien, fir Aktivitéiten an der Gemeng ze organiséieren

Pompjees- a Rettungswiese si fir d'ADR e wichtige Bestanddeel vun der lokaler Sécherheet. Dofir sollen dës Kräfte déi néideg Ënnerstëtzung kréien, fir sech beschtméiglechst organiséieren ze kënnen.

Zäit fir alternative Wuesstem



Déifferdeng wíisst a wíisst a gëtt zesummegeäckelt ...

Déifferdeng wíisst...a wíisst,

25.611 Awunner huet eis Gemeng zënter Juni 2017.

An der Period tëscht 2010 (Ära Meisch) an 2015 (Ära post-Meisch) ass eis Gemeng, „demographesch“ gesinn, mat engem Awunnerplus vun 11,4 Prozent esou vill gewuess wéi an der ganzer Zäitspann vu 1945 bis zum Joer 2000.

25.611
Awunner huet
eis Gemeng

W a t
h e e s c h t
d a t
d'Zukunft
vun Dé-
ifferdeng?

Wéi gesäit eis
Stad am Joer 2025

aus? Wéi kann een dee Wuesstum besser geréieren?


D'ADR proposéiert en Wuesstumsmodell, dee méi op Qualitéit baut a manner op Quantitéit. Et gëtt vill gebaut, an dat ass favorabel, et schaaft Rächtum an an Aarbechtsplazen. Dëst muss awer op Basis vun enger intelligenter an qualitativ interessanter Verdeelung vun Infrastrukturen, Kultur a Mobilitéit gescheien.

Liewensqualitéit verbessern, an dat uechter d'Ganz Gemeng muss d'Zil sinn, an dat op laang Dauer. Nei Citée wéi zum Beispill „Mathendahl II“ sollten mat engem „Shared Space“ ausgestatt gin. Vill gréng Fläschchen sollten dobäi aménagéiert gin, eng adequat Verbindung zum Diffbus sollt enstoen an sou Citéen dierfen net an Saakgaassen enden, mee un verschiddenen Punkten un d'existeierend Infrastruktur ugeschloss gin sou dass eenzel Verkéiersooderen net wieder onnéideg belaascht gin.

Och schon existent Citéen dierfen a punkto Liewensqualitéit näischt abéissen, ee Beispill heivir ass d'Spillplaz an der Rue des Lignes zu Nidderkuer, déi Plaz muss man fir Sozialwunnengen, wat a punkto Soziale Mix secher keng schlecht idee ass, mee de fakt dass Gréngflächen a Spillplazen verschwannen müssen fir „Baulücken“ ze fëllen ass net déi richteg Politik.

An dobäi kënnt nach dass déi Spillplaz déi verschwonnen ass, e puer 100 meter méi wäit opgebaut gin ass, op enger kritescher Plaz, souwuel fir déi Leit déi do Wunnen an och fir D'Kanner selwer, nämlech tëscht Privatgärt an dem Schinnennetz.

Bevölkerung: Entwicklung ausgewählte Süd-Gemeinden 1900 -2015



Déifferdenger Wuesstem (déi blo Linn): Di Ziffere weise tracks no uewen, mat alle Problemer, déi domat verbonne sinn. D'Graphik ass aus enger Etude vum Institut européen de Recherche, de Développement et d'Action iwwer Szenarien vun der Bevëlkerungsentwécklung bis 2025.

Politesch Schänhellegkeet an der Wuesstemsfal

Wat kloen eis Gemeengepolitiker zu Déifferdeng an och an aner Uertschaften! A wat stëmmen si an der Chamber äifreg fir eng Politik, déi de gréissten Deel vun deene Problemer ausléist!

Anescht wéi aner Länner wíisst d'Wirtschaft zu Lëtzebuerg och a Krisenzäiten. Dat ass eent vun den Haaptziler vun der Lëtzeburger Politik, en Zil, dat een awer méi genee misst ënnert d'Lupp huelen.

Esouguer a Kriesejoren ginn zu Lëtzebuerg nach eng 10.000 Aarbechtsplaze geschafen, a bei véier Prozent Wirtschaftswuesstem sinn et der gutt 15.000.

De Gros vun deene Aarbechtsplaze gëtt vu Grenzgänger besat, well hei am Land anscheinend déi néideg Qualifikatiounen feelen. 80 Prozent vun de Grenzgänger komme mam Auto op hir Aarbecht, well den öffentlichen Transport net déi néideg Kapazitéiten huet oder well si net mam öffentlichen Transport vun doheem op hir Aarbecht kommen. Dat mécht am Schnëtt ronn 8.000 zousätzlech Autote pro Joer aus. Een Auto bedeit sechs Meter am Stau. An anere Wieder gëtt eist Stroossenetz mat 8.000 Autoen mat bal 50 Kilometer Stau pro Joerweider belaascht - iwwer den Dag verdeelt.

Wa mer eng Politik maachen vu weiderem stramme Wuesstem gëtt de Verkéierschaos vun Dag zu Dag méi grouss an déi eenzel Stied an Uertschaften mat Autoslawinen erstéckt.

Genausou verhält et sech mat der Wunnungsproblematik. Wa mir esou vill Aarbechtsplaze schaafe an d'Leit all Dag am Stau stinn, ass et eng logesch Konsequenz, datt déi méi no bei hir Aarbecht wëlle wunne kommen. Duerfir gëtt den Drock op de Wunnungsmaart vu Joer zu Joer méi grouss, an d'Präisser, wéi an de leschte Joeren, praktesch ëm 5 Prozent pro Joer klammen.

Net nëmme ginn duerch Industriezonen d'Wisen zoubetonéiert, mee dës Politik dréit och nach zu engem zousätzleche Verkéiersopkomme bäi. Mat dëser Politik wäert an de nächste Joeren de Verkéierschaos vun Dag zu Dag méi grouss ginn.

Schänhelleg ass et duerfir, wann d'Parteipolitiker an der Gemeng versichen, sech de schéine Männchen bei hire Bierger ze maachen, a sech opreegen iwwer de Verkéierschaos, deen Dag fir Dag an dësen Uertschaften méi grouss gëtt.

Et sinn awer déi nämmleche Politiker, déi op Gemeengeplang matdecidéiert hunn, déi Industriezonen do ze implantéieren an op nationalem Plang als Deputéierten d'Politik vun engem maximale Wuesstem blannemännchenes ënnerstëtzen.

Matschaffen!
Froen?
Ureegungen!

Hutt Dir Froen oder Ureegungen oder wëllt Dir bei ons aktiv matschaffen, dann zéckt net a rufft un, ënner der Nummer:

+352 26 20 37 06

Lëscht 7



Carlizzi Gilles
23 Joer, Nidderkuer
Student



Klein Jean
75 Joer, Uewerkuer
Pensionéiert



Angelini Valentino
44 Joer, Nidderkuer
Geschäftsmann



Carlizzi Nico
57 Joer, Nidderkuer
Pensionéiert



**Cabo da Costa
Olivia Maria**
38 Joer, Déifferdeng
Salariée



Faber Christian
29 Joer, Uewerkuer
Gemengenemployé



Gasbarrini Olympia
59 Joer, Fousbann
Geschäftsfra



Giannotte Joëlle
36 Joer, Fousbann
Salariée



**Holper-Gilbertz
Marie-Josée**
73 Joer, Uewerkuer
Pensionéiert



Mamer Luc
35 Joer, Nidderkuer
Vendeur



Melchior Antoine
73 Joer, Uewerkuer
Pensionéiert



Müller Christian
50 Joer, Déifferdeng
Salarié



Raach Philippe
22 Joer, Uewerkuer
Elektriker



Raschella Nicodemo
61 Joer, Nidderkuer
Pensionéiert



Schroeder Jean-Marie
53 Joer, Déifferdeng
Pensionéiert



Seidel, Steve
30 Joer, Uewerkuer
Chauffeur



Seidel ép. Klein Viviane
42 Joer, Uewerkuer
Salariée



Thoss Gisèle
52 Joer, Nidderkuer
Hausfra



Valle Mireille
28 Joer, Fousbann
Salariée